

lis Gnovis

■ **SANTE MARIE LA LUNGJE-CJOPRIS.** Jù lis tors di aghe



Il Consorzi dal acuedot dal Friül Centrâl al veve scomençât, cualchi an indaûr, a meti in polse chei grançj contignidôrs di aghe che a permetin di puartâ la aghe tes cjasis dai nestrîs paîs. Lis clamin ançje 'tors piezometricis', a son des grandis vascjîs tignudis sù di pilastris, massime in beton, dulà che par sot e ven mandade sù la aghe in pression che daspò e ven lassade colà par che e puedi cori par dut l'acuedot. Struturîs aromai che no son plui buinis di fâ il lôr servizi cemût che al covente. Il svilup urbanistic dai paîs e la cressite de popolazion a àn fat là al mancûl il vecjo sisteme, cussì che si è scugnût proviodi in altri mût. Come a Sante Marie la Lungje e a Cjopris, dulà che lis dôs tors a jerin stadis fatîs sù tai agns Cincuante; i lavôrs di modernament lis àn mitudis in pension, si che tai dis passâts a son stadis sdrumadis. Migo robe di pôc: vascjîs e pilastris di beton altis passe cuindis metris a son coladis jù tun marilamp. A son bastadis piculis cjariis esplosivis par sdrumâ chei bocons di beton, e lis lôr sacumis a son discomparidîs par simpri dal paisaç di chei paîs.

■ **UDIN.** Cui aial robât i miluçs de aziende agrarie de Universitàt?

A vevin preparât dut cemût co va, chei che tai dis passâts a son jentrâts, cuntun furgon, te aziende agrarie Servadei de Facoltàt di Agrarie, par robândi i miluçs; migo miluçs cualisei, ma miluçs ben studiâts dai ricercjadôrs de Universitàt. Magari chest i fuffants no lu savevin, ma ben che a jerin madûrs par jessi cjoltîs sù. Si trate di pomis di un miluçâr dulà che uns cuindis agns indaûr i ricercjadôrs a vevin inviade une sperimentazion cun chê di rivâ a otignî pomis che no vessin bisugne di cuissâ ce trataments. I larîs a àn fiscât ben trê filârs par 75 arbui, par cualchi cuintâl di pomis: pôc valôr comerciâl, ma di grant valôr sperimentâl, che i risultâts no si podaran plui cognossi. E che no fossin stadis robadis, chês pomis, impen che par mangjâlis, di cualchi aziende che e prodûs propit chei trataments che i ricercjadôrs a volevin eliminâ?

■ **UDIN.** Un paneton di gale

Va ben che nol è propit chest il timp par gustâ panetons, ma la gnove e je masse golose par no contâle. E alore e va contade, parcè che il Friül, oltri che pe gubane – ma tal forest no si fasin – a si è fat cognossi par un paneton di gale, che di resint al à vinçût un premi tant che secont miôr paneton de Italie. Il ricognossiment al è rivât al paneton creât di Jean Venier, pancôr e scaletîr dai Riçs, cun altris buteghis a Udin, te decime prime edizion dal premi "Panetone Day", dedicât ai panetons artigianâi de Italie. Il paneton di Venier – unic de nestre region – al à superât lis selezioni cun 400 di lôr, che ae fin a son restâts in cuindis, e al è rivât a un pèl dal prin puest, cemût che e à ricognossût la Jurie, vuidade dal scaletîr dal an 2009, Gino Fabbri. I scrutadôrs a àn valutât levitazion, profumo – mi ven la aghegole dome a scrivi – arome, morbidece e cuete. Content come une Pasche, ançje se si varès di di come un Nadâl, Jean Venier, che di tancj agns al lavore cun passion. Dome un pecjât: i panetons finaliscj a saran vendûts dome al "Panetone Day", che si tignarà a Milan tal mès di Otubar. Dut câs us spii il puest, se o volessis cercâ al mancûl un fruçon: lu cjatais in cors Garibaldi, ma atents, e je une strade simpri incolme di visitadôrs, cun grande passion pai panetons.

Miercus 20	S. Eustachi martar	Domenie 24	XXV Domenie vie pal an
Joibe 21	S. Mateu apuestul	Lunis 25	S. Aurelie pelegrine
Vinars 22	S. Maurizi martar	Martars 26	S. ts Cosme e Damian
Sabide 23	S. Piu di Pietrelcina	Il timp	Timp variabil



Il soreli
Ai 20 al jeve aes 6.51
e al va a mont aes 19.09.



La lune
Ai 22 Prin cuart.

Il proverbi
La robe di chest mont e à di fâ la spese a ducj.
Lis voris dal mès
Intal ort cumò al è plui lavôr di cjapâ sù
che no di semenâ; ma lidric, rucule, salate
a son simpri prontos a cressi, baste semenâju.

Chel leam antîc tra Aquilee e Como

Como, fasint part de metropoli di Aquilee, al fasè so ançje il rît patriarcjin, che lu doprà fin al 1596, cuant che al fo abolît



Il Domo di Como

A l jere stât propit un lunc rapuart, ançjemò ai tîmps dai Langobarts, a leà adun Aquilee cu la comunitât cristiane di Como; un leam che al nasè par vie dal schisme dai "Trê Cjapitui", a scomençâ dal an dal Signôr 548. In chel an, il debut pape Vigilli, stiçât de cort imperiâl di Bizanzi, che e paronave su di une buine part de Italie, al veve condanât lis posizions teologjichis e i scrits di trê teolics: Dietri di Mopsuestia, Dietri di Ciro e Bibas di Edessa, cun dut che il concei di Calcedonie an 'ndi ves ricognossude la ortodossie, che intun prin moment ju veve acetâts ançje il pape. Cheste contradizion, subide dal pape pûr par resons politicis che a stavin ce tant a cûr al imperadôr Justinian, e puartâ a un schisme grandonon, cun tantis Glesîs che si slontanarin dal "dictat" di Rome e, tra chetis, Milan, Aquilee e Como. Massime la Glesie di Como si mostrâ infotade cuintrî il papât, ançje parcè che si ritignî ofindude par vie che un so vescul, Abbondio, al jere stât tra chei che a vevin metudis jù lis fondis dal concei di Calcedonie e aprovât lis sôs decisions. Se Milan, pôc dopo, al tornâ tal grim di Rome, Como invectit si slontanâ de sò antighe metropoli par leâsi a Aquilee, cussì che il clericât e il popul comasc a domandarin la consacrazion dal vescul Agripin propit ae comunitât sùr tal rivoç tricapitulin. E chest leam nol vignî al mancûl nancje daspò dal 689, cuant che si sierâ il schisme. Cussì che Como al restâ sot de jurisdizion dal patriarcjât fin tal 1751, cuant che il pape Benedet XIV lu sdrumâ di plante fûr.

Ma chel leam al restâ salt ançje dopo: cuant che Como al veve di siezzi come gnûf vescul

chel di Gurize o di Milan, al preferî il prin, e dome tal 1789 il pape Pio IV, sbassant il cjâf denant dal imperadôr Josef II, al ripuartave Como sot lis alis di Milan. Como, fasint part de metropoli di Aquilee, al fasè so ançje il rît patriarcjin, che lu doprà fin al 1596, cuant che al fo abolît. E cun di plui al veve cirût, massime cul vescul Filip Archinti, di oponisi, fin tal ultin, ae abolizion di chel rît, cemût che nus pandin documents che e vegnin di chêt bande. Un di chescj, cetant impuartant, al è un test stampât tal 1557 par cure dal Arcipredi Laurinç Maggi: si trate di un Sacramentarium patriarchale secundum morem Sanctae Comensis Ecclesiae, che in du-sinte cartelis stampadis in caratars ros e neris

al ten dentri i tescj e lis cjantis propriis di tantis cerimonis dal an liturgjic, secont l'ûs dal patriarcjât e il costum di Como. Dongje dai tescj par latin si cjatavin ançje lis melodiis, stampadis in notazion cuadrade come tal cjant gregorian, dulà che lis notis a vignivin indicadis sot forme di cuadrâts. Inte premesse, si lei che il libri al fo metût dongje par cirî di meti man a une situazion che e someave avonde dramatiche, pe inarestabile decjadince de tradizion liturgjiche-musicâl patriarcjine, che par secui e veve tignudis adun lis dôs comunitâts. Pecjât che pôc timp daspò, cence tignî cont dal parê dai interessâts, il rît al vignarà abolît.

Roberto Iacovissi

Pasian di Prât. Cors gratuit di lenghe furlane

L'Assessorât ae Culture dal Comun di Pasian di Prât, in colaborazion cu la Arlef, al à inmaneât un cors gratuit di lenghe e culture furlane, tignût dal mestri Fausto Zof. La presentazion de iniziative, vierte al public, e sarâ ai 26 di Setembar aes 6 sore sere te sale consiliâr di Pasian di Prât, cu la leture di une trentine di poesiis. Lis leziions dal cors e saran ogni miercus tacant di miercus ai 4 di Otubar, des 6 aes 8 sore sere, inte Sale Sguerzi de Biblioteche di Pasian di Prât. Par vê plui informaziions e par notâsi: 0432 645957.

Tradizions furlanis dal mès par cure di Mario Martinis

SANT MATEU

Nassût cul non di Levi, di profession al faseve l'esatôr des tassîs; al fo clamât di Jesù a sei un dai dodis dissepui cognossût come Mateu, apuestul e evanzelist. La tradizion cristiane lu ricognòs autôr di un dai cuatri vanzelis sinotics, ma ançje personaç di riferiment di altris tescj apocrifis come il "vanzeli dal pseudo Mateu", che al fevele de infanzie di Crist, i "Ats di Mateu" e il "Martiri di Mateu" che int contin la predicazion. Te iconografie cristiane al ven figurât come vieli cu la barbe che al à come embleme un agnul che lu ispiri o i vuide la man intant che al scrîf il so vanzeli e dispès dacis di une spade, simbul da so martueri. Sant Mateu, che la fieste liturgjiche e cole il 21 di setembar, nol va confundût cun Sant Matie chel altri apuestul cuasi omonim che la stesse tradizion furlane e met adun.

Come che al è sucedut cetantis voltis inte agjeografie cristiane, ançje la colocazion strategjiche tal calendari de fieste di San Mateu (in chest câs a coincidi cu la date strategjiche dal ecuinozi di autun) e je diventade date di riferiment te culture dal popul tant di influî ançje su la sò

fortune devozionâl e su lis stessis valenzis simbolichis de sò memorie liturgjiche.

In tâl maniere une volte la fieste di Sant Mateu e jere une impuartante date di riferiment dal calendari rurâl e stagjonâl come che confermin ben trê proverbis che però a clamavin il sant Matie e no Mateu: "A Sant Matie la vuite si invie" e "A Sant Matie l'oseladôr al salte in pie" (che colegjin la date al aucupi dai uciei e ae ativitât venatorie une volte cetant pandude ançje in Friül) e "San Matie e cidivoc, tant il di che la gnot". Di fat, tor il 22 di setembar si verifiche la meravee astronomiche dal ecuinozi, cuant che il soreli sbassantsi su la linie dal orizzont celest al compuarte che la durade dal di e sei avuâl a chêt de gnot.

Di li al comence l'autun cu lis sôs atmosferis tenaris e delicadis e lis sôs zornadis tividinis ma che si scurtin simpri di plui e che une volte, passe che timp di vendeme, al jere il timp dai foncs e purtrop, come che contin ançje i proverbis, timp dai oseladôrs che lavin a cjapâ i uciei che passavin par migrâ tes tieris cjaldis.